



partii naleraq

UPA2016/83

Inatsisartut aalajangiiffigisassaattut siunnersuutigineqarpoq Naalakkersuisut peqquneqassasut 2017-mi innutaasut paasititsiniaaffigineqareernerup aammalu oqallitsinneqareernup kingorna isumasiuilluni taasitinneqassasut, qanoq Kalaallit Nunaanni aatsitassarsiornermi piiakkat pingaanerit saniatigut piiakkat sinneranik tunisassiassanik radioaktiviussinnaasunik takussutissartalinnik imaluunniit akulinnik atorluarneqarsinnaaneranut atatillugu innuttaasunik isumasiuilluni taasisitsisoqassasoq qummut qaffasinnerpaaffissaliisoqarnissaanik 0,05%-imut.

(Inatsisartunut ilaasortaq Steen Lynge, Atassut)

Partii Naleraq uranimut naaggaartuuvoq.

Taama aallarniuteqarusuppugut uunga Steen Lynge Atassummeersup aalajangiiffigisassatut siunnersuutaanut. Ippassaq siunnersuut alla pisuussutitsinnut tunngasoq maani inersuarmi eqqartorparput, ilaatigullu uagutsinniit oqariartuutigalugu taanna pisuussupput allanik tamanit pingaarnerpaanngortillugu suliniutigalugu aallartittariaqalersugut. Taamatullu aamma ilissi parteersi sinnerlugu Siverth K Heilmann taama oqariartuuteqarluni. Pisuussut taanna tassaavoq imeq.

Tungitsinniit nassuerutigissavarput, tamakku oqaluuserissallugit uagutsinnut pingaarnerujussuartut isigingatsigit, isumaqatigiissutigangut, tunisassiarinerani mingutitsinaviangillat, pingaarnertullu pisuussutigaarput naassaangiusartumik annertussusilik, nunarsuarmioqatitta annertusiartuinnartumik pisariaqartitaat.

Siunnersuummullu uteqqilaariarutta qulequtaa aallaavigalugu, ugguuna isumaqataasinnaavugut – innuttaasut aperineqartariaqarput, akuersaarsinnaanersut akerliunersulluunniit, naaggaartuugattali procentilersornissaa promillelersornissaaluunniit isumaqataaffigisinnaangilarput. Imerk tunisassiorniarnermiit illuatungerluinnaaniippoq. Ukiuni tusintilinni amerlasuuni pinngortitamik mingutitsinera nungukkallarnaviangilaq, nunarsuarmioqatitta imermiit pisariaqartinnerunneqaat, sakkussiaruarnut atorneqarsinnaavoq, ilaalu ilanngullugit. Ilanngullugulu erseqqissaatigilarput, uranip ulorianassussaa mingutitsisinnaaneralu minnerpaamilluunniit annikillinaviangimmat “saniatigut” piarniaraluaanniluunniit.

Taamaattumik Partii Naleqqami isumaqarpugut tamakku unitseriarlugit, pisuussutit isumaqataaffigisinnaasagut tamakkerluta pimoorullugit suliarilertigit, qulakkeerlugu kalaaliulluta iluanaarnissarput, isiginnaartuinnaanata, nammineq pigalugu, pisuussutitta annerpaartaa sanilliunneqarsinnaangitsoq – aamma imeq.

Taama oqaaseqarluta, taasititsinissartaa isumaqatigisinnaangaluarlugu siunnersuut qulequtaa tunngavigalugu itigarterujussuarparput, qujavugulli siunnersuuteqartoq sapiiserluni saqqummiussimmat.

Qujanaq